

**USKLADIVANJE PROPISA O SLATKOVODNOM
RIBARSTVU IZMEĐU SR BOSNE I HERCEGOVINE,
SR HRVATSKE I SR SRBIJE**

U »Službeom listu SR BiH« broj 4/68. objavljena je nova Naredba republičkog sekretara za poljoprivredu i šumarstvo o uslovima za vršenje ribarstva u ribolovnim vodama SR BiH. U naredbi ima izvjesnih izmjena dopuna u odnosu na raniju naredbu, ali je u njoj posebno važno, da se na graničnim dijelovima tokova prema SR Hrvatskoj i SR Srbiji usklađeni propisi o minimalnim mjerama i lovostajima sa propisima pomenutih republika. O ovom usaglašavanju je sporazum između nadležnih republičkih organa, po načelu da se pri usklađivanju propisa u cilju zaštite plemenitih i drugih vrijednih vrsta riba, usvoje propisi republike, koja određuje najcjelishodnije mjere zaštite.

Prema novoj naredbi na graničnim dijelovima tokova prema SR Hrvatskoj i SR Srbiji određene su iste minimalne mjere za mladicu i smuđa i lovostaje za lipljena i šarana, kao što su određene u pomenutim republikama.

U cilju zaštite ribljeg fonda naredbom su predviđene i neke nove mjere zaštite. Tako je u sportskom ribolovu zabranjena upotreba podvodne vještačke mušice sa utegom, jer se je upotreba ovog mamka štetno odrazila na fond lipljena i mekousne pastrve. Pored toga, naredbom je određen maksimalni dozvoljen broj komada ulova riba pri vršenju sportskog ribolova. Ovom zaštitom obuhvaćene su sve vrste salmoneida i veći broj vrijednih ciprinidnih i drugih vrsta riba.

U naredbi ima i izmjena u pogledu lovostaja na toku rijeke Neretve u toliko, što se od režima zabrane lova svih vrsta pastrva u vremenu od 1. IV do 1. XI izdvaja dio toka Neretve od izvora do Krupačkih stijena ispod Uloga. Na ovom dijelu toka važi lovostaja za pastrve kao i na ostalim vodama, t. j. od 1. X do 1. III. Područje ribolovnih voda, na kojima je dozvoljen privredni ribolov (ranije samo Sava graničnim tokom i Hutovo blato sa rijekom Krupom), prožireno je i dijelom toka rijeke Bosne na području opštine Bosanski Šamac.

M. V.